

**Naalakkersuisut namminersortunngorsaannermut isumalioqatigiissitamik pilersitsinissaannut, pisortat suliffeqarfiit tamakkiisumik tamakkiisumiinngitsumillu pigisaannik misissueqqissaartussanik siunnersuuteqartussanillu suliffeqarfiit sorliit namminersortunngorsarnerinit iluanaaruteqartoqarsinnaaneramik suliaqartussanik aalajangiiffigisassatut siunnersuut. Misissuineq UKA 2017-mi Inatsisartunut tunniunneqassaaq.**

(Inatsisartunut ilaasortaq Poul Hansen, Demokraatit)

### **Akissuteqaat**

(Naalakkersuisut Siulittaasuat)

### **Siullermeerneqarnera**

Aallaqqaasiullugu Naalakkersuisut suliffeqarfiit inuiaqatigiinnit pigineqartut namminersortunngorsarneqarnerisa siuarsarneqarnissaat pillugu aalajangiiffigisassatut siunnersuummut saqqummiunneqartumut qujapput. Aalajangiiffigisassatut siunnersuut tunngavissiilluarpoq ingerlatseqatigiiffinnik Namminersorlutik Oqartussanit pigineqartunik namminersortunngorsaanaissaq pillugu erseqqissaanissamut, aamma ingerlatseqatigiiffiit Namminersorlutik Oqartussanit pigineqartut akornanni namminersortunngorsaalluni suliaqarnissamut suut tunngaviussanersut ersersinnissaannut.

Siunnersuuteqartup kissaatigaa Naalakkersuisut namminersortunngorsaannermut isumalioqatigiissitamik pilersitsinissamut peqquneqassasut kiisalu isumalioqatigiissitap suliai UKA 2017-imi Inatsisartunut saqqummiunneqassasut.

### **Ingerlatseqatigiiffinnik Namminersorlutik Oqartussanit pigineqartunik namminersortunngorsaaneq**

Naalakkersuisut aallaqqaasiullugu ilisimatitsissutigissavaaat ingerlatseqatigiiffiit aqutsisui suleqatigalugit ingerlatseqatigiiffiit Namminersorlutik Oqartussanit pigineqartut ataasiakkaat ingerlatseqatigiiffimmi tamarmiusumi imaluunniit ingerlatseqatigiiffiup ilaani namminersortunngorsarneqarsinnaaneranut piareersimanersut nalilersuisoqartartoq. Nalilersuinerit taakku aningaasaqarnermut inuiaqatigiinnullu tunngassutilinnut sammitinneqartarput, tassa takussutissat pingaarutillit namminersortunngorsaasinnaaneranut isummernissamut tunngavissaasariaqarmata.

Inatsisartuni partiit naalakkersuisooqatigiittuut erseqqissumik oqaatigaat namminersortunngorsaannermi pisortat inuussutissarsiuteqartunut akuliussinnaanerat annikillisinneqassasoq. Peqatigitillugu innuttaasunik kiffartuussinerup ajorserianninnissaa pillugu piumasaqaateqarpoq. Suliffeqarfiit Namminersorlutik Oqartussanit pigineqartut

namminersortunngorsarlugit suliniuteqarnermik Naalakkersuisut nalilersuillutik suliaqarnerminni anguniakkat taakku tunngavigivaat.

Naalakkersuisut isumaqarput suliffeqarfiit pisortanit pigineqartut namminersortunngorsarneqartarnerat misilittagaqarfigilluaripput, assersuutigalugu Pisiffiup Kitaani illoqarfinni arfiniliusuni namminersortunngorsarnissaanut Inatsisartut 2001-imi akuersimmata. Ullumikkut Pisiffiup 85,8 %-ia namminersortumit pigineqarpoq, Namminersorlutik Oqartussanit pigineqartup Greenland Venture A/S-ip 14,2 %-it pigigai. Pisiffik A/S-ip namminersortunngorsarneqarnerata takutippaa suliffeqarfimmik Namminersorlutik Oqartussanit pigineqartumik iluatsilluartumik namminersortunngorsaasoqarsinnaasoq. Ingerlatseqatigiiffik ullumikkut niuerfimmi unammilleqatigiinnermi atugassarititaasut malillugit naligiimmik kiffaanngissuseqartumillu ingerlatsivoq, niuerfiullu unammilleqatigiinnermi suliffeqarfik Namminersorlutik Oqartussanit pigineqartoq ingerlatsinermini eqqarsaatigisariaarullugu.

### **Ingerlatseqatigiiffinnik Namminersorlutik Oqartussanit pigineqartunik namminersortunngorsaalluni sulineq**

Ingerlatseqatigiiffinnut Namminersorlutik Oqartussanit pigineqartunut pingaaruteqarpoq ingerlatseqatigiiffiup ingerlanneqarnerata ineriartortinneqarneratalu patajaatsumik sinaakkuteqartinneqarnissaa. Taamaammat siunnerfeqarluni ineriartortitsinissamut suliniutit, tassunga ilanngullugit ingerlatseqatigiiffiit ataasiakkaat namminersortunngorsarneqarsinnaanerata pillugit piginnittut pisortallu akornanni oqaloqatigiittoqartariaqarpoq. Tamanna Naalakkersuisut isumaat malillugu kajuminnarneruvoq, tassa ingerlatseqatigiiffiit aningaasaqarnikkut inissisimanerat inuiaqatigiinnullu pingaarutilimmik naleqarnerat eqqarsaatigalugu.

Eqqarsaatiginninnerit taakku marluusut malillugit namminersortunngorsaalluni suliaqarnerit mianersortumik ingerlanneqassapput. Pingaartumik namminersortunngorsaanerup nalaani ingerlatseqatigiiffiit ataasiakkaat iluanni pissutsit avammut saqqummiunnaveersaarnissaat pingaaruteqarpoq, tassa tamatuma suliffeqarfiit Namminersorlutik Oqartussanit pigineqartut tunineqarneranni naliliisarneq tunisaqarnermilu iluanaarutit ajornerulersissammagit.

Ingerlatseqatigiiffiit nunatsinni inuiaqatigiit akornanni assigiinngitsunik suliaqartarput. Pingaaruteqarpoq tamatuma eqqumaffigineqarnissaa. Ilaat niuerfinni kiffaanngissuseqartumik unammilleqatigiiffiusumilu ingerlatsisarput, allat nalinginnaasumik unammilleqatigiinnerup avataani inatsisit akuersissutilluunniit malillugit inuiaqatigiinni suliassanik isumaginnittarput. Kingulliit pineqartut pingaartumik attaveqarnermut tunngassutilinnik suliaqartuupput. Allani ingerlatseqatigiiffeqarpoq siunnerfilimmik niuernissamik siunertaqanngitsunik, allalli pissutigalugit aktiatigut ingerlatseqatigiiffittut aaqqissuunneqarsimasunik. Tamanna tunngavigalugu ingerlatseqatigiiffinnik Namminersorlutik Oqartussanit pigineqartunik namminersortunngorsaasoqassappat pisariaqarpoq ingerlatseqatigiiffiit immikkut ataasiakkaarlutik ingerlatsinerat aallaavigalugu misissorneqarnissaat, tassa ingerlatseqatigiiffiit namminersortunngorsarneqarsinnaanerata tunngavigalugu.

Oqaaseqaatigineqartut tunngavigalugit Naalakkersuisut ersersikkusuppaat  
 ingerlatseqatigiiffinnik Namminersorlutik Oqartussanit pigineqartunik  
 namminersortunngorsaaneq suliassaasq annertoq suliassaasorlu pitsaasumik  
 ajortumilluunniit inuiaqatigiinnut annertuumik kinguneqarsinnaasq. Kattuffiup OECD-p  
 ukiut hundredikkuutaartut 21-anni namminersortunngorsaaneq pillugu nalunaarusiami  
 oqaluuserivaa ingerlatseqatigiiffiit naalagaaffimmit pigineqartut  
 namminersortunngorsarneqarneranni aningaasaqarnikkut, inooqatigiinnikkut inuiaqatigiinnilu  
 unammilligassat qanoq isumagineqarsinnaanersut.

Nalunaarusiaani pingaartinneqarluni erseqqissumik oqaatigineqarpoq ingerlatseqatigiiffiup  
 naalagaaffimmit pigineqartup namminersortunngorsarneqarnissaanut sinaakkutissat  
 erseqqissuunissaat. Tassani pingaartinneqarpoq namminersortunngorsaanissamik  
 eqqarsaasersuutit aaqqissuulluakkamik ingerlatseqatigiiffinnullu naalagaaffimmit  
 pigineqartunut tunngatillugu ataasiakkaarlugit ingerlanneqarnissaat. OECD-mit  
 inassutigineqarpoq allaffissortussanik namminersortunngorsaanermik suliaqartussanik  
 pilersitsisoqassasq, erseqqissaatigineqarpoq allaffissortut takku inatsisiliortut ataanni  
 inissisimassasut.

Naalakkersuisut OECD-p nalunaarusiaani inassutigineqartut ilalerpaat.

### **Namminersortunngorsaanermi isumalioqatigiissitamik pilersitsineq**

Pitsaanerpaamik namminersortunngorsaasoqarsinnaanera qulakkeerniarlugu pingaaruteqarpoq  
 namminersortunngorsaanissaq siunertarigaanni ingerlatseqatigiiffiit ataasiakkaat  
 namminersortunngorsarneqarsinnaanerannik nalilersuinermi ingerlatseqatigiiffiit  
 assigiinngitsuunerisa eqqarsaatigineqarnissaat. Naalakkersuisunit isumaqatigineqarpoq  
 ingerlatseqatigiiffiit ataasiakkaat Namminersorlutik Oqartussanit pigineqartut tamakkiisumik  
 ilaannakortumilluunniit namminersortunngorsarneqarsinnaanersut nalilersortuartarnissaat.  
 Taamaattoq erseqqissaassutigineqassaaq ingerlatseqatigiiffiit iluanni pissutsinik avammut  
 saqqummiussinerup suliffeqarfiit Namminersorlutik Oqartussanit pigineqartut  
 tunineqarneranni naliliisarneq tunisaqarnermilu iluanaarutit ajornerulersissammagit.

Naalakkersuisut tamanna tunngavigalugu aalajangiiffigisassatut siunnersuummi siunertaasq  
 isumaqatigisinnaavaat, tassa suliffeqarfiup pisortanit pigineqartup niuernermit sammititamik  
 namminersortunngorsarneqarnerata siuarsarneqarnissaa isumaqatigisinnaavaat,  
 Naalakkersuisulli peruseriniarneqartoq aalajangiiffigisassatut siunnersuummut  
 kinguneqarsinnaasq akuerisinnaanngilaat. Naalakkersuisut aalajangiiffigisassatut  
 siunnersuummut allannguutissatut siunnersuut manna saqqummiukkusuppaat:

*”Ingerlatseqatigiiffiit namminersortunngorsarneqarsinnaanerat siunertaralugu ingerlatseqatigiiffiit Namminersorlutik Oqartussanit pigineqartut tamakkiisumik ilaannakortumilluunniit namminersortunngorsarneqarsinnaanersut misissoqqissaarneqarsimanerannik imalimmik Naalackersuisut nalunaarusiornissamut peqquneqarnissaat pillugu Inatsisartut aalajangiiffigisassaattut siunnersuut. Nassuiaat kingusinnerpaamik UPA 2018-imi Inatsisartunut saqqummiunneqassaaq.”*

Taamatut oqaaseqarlutik Naalackersuisut qilanaarput aalajangiiffigisassatut siunnersuutip saqqummiunneqartup Inatsisartuni suliarineqarnissaanut.